

Als erschts hät ich gärn vom letschte Jahr die Mäldig korrigiert
wenner gsänd händ d`Riniker Schnurri ond ich jetz doch ned fusioniert
denn wo mer chörzlech nonemol d`Vor- ond d`Nochteil tüend verglieche
do hämmer gmerkt benere Fusion müesste mer 4 Stelle striche

Wotsch weder einisch dini Frau beglöcke problemlos ond onbeschwärt
jo de weisch set chorzem gets jetz do e neuu Pelle of em Märt
aber pass uf das ned die faldschi verwötschisch du arme Schlawiener
well sosch werd de dies beschti Stock nähmli emmer chliener

An Ogi Dölf schriebts IOC ennere Annonce
als Olympiakandidat het Sion leider kei Chonce
well set dem Jahr näme mehr esch die lapidar Erklärig
Bestächigsgälder nome no e de neue Euro Währig

Nach de letschtjährige Regierigsrotswahl duet d`SP em Aargau bätte
liebe Papst Johannes Paul chöndsich ned zo eus ue jätte
well du reisch so hämmer ghört da du so ne flotte besch
grad emmer gnau det ane wo d`Not ond s`Eländ am gröschte esch

Fensch ar Fasnachtseröffnig en Platz er Tannegg ond fende d`Schötze en Presidant
em Hersche fensch en offni Tör ond e de Tornhalle suberi Wänd
a de Gmei fend de Bronner ich säge nüt ond de Stüüvogt fend förigs Gäld
jo de weisch jetz semmer z`Rinike e de Märliwält

E de Laudatio vom Jubiläumskonzärt duet euse Gmeindamme meine
mer heige näb de Musiggsellschaft z`Rinike no 20 anderi Vereine
hey Ueli wo hesch den du gleert zelle das wörd`mi scho wonder neh
well nach de Gschänk wod Musig het übercho do chomi nomme of zwe

Euse Melchior als Bondesrot das wären gsi de Hammer
kei Purredemo me en Bärm ond au kein Melchpriesgjammer
doch wonner de nei seit zor Kandidatur do hani so dänkt em gheime
mues de jetz wörkli so störrisch si we ame sin Esel deheime

Wenn mer ame do die Helge zeichne gets dere wo abverheye
die gsänd den us wie moderni Konscht dromm duenesi ned fortgheyed
nei die geb ich denne eusere Gmei die chönndsi den verwännde
als Entworf för es Beld ad Schuelhuswand oder för en neue Kaländer

40. Jahr lang chrampe för eusi Gmei das chasch ned wägdiskotiere
dromm wet ich der Mächler Othmar do nomol nachträglech gratuliere
das du als Bändner doabe besch cho verwonderet secher en Huufe
doch ich begrifs wells Calandabräu das chasch jetz wörkli ned suufe

Euse Männertornverein de frog`sech ganz frustriert
wiso si die Boustelletafele wo si heige montiert
be de Tornerobereklamewand weder müessed go abeschriesse
wenn si glichzeitig dors halbe Dorf gönd go d`Stross ufriesse

He was machsch do hani min Nochber gfrogt ond be ganz irritiert
wo de si Frau ond Chender födleblott en Dachständer ufe bugsiert
jetz fahr er met sim Auto ed Wöschalag nänei er düeg de ned öppe spenne
aber be eusem neue Wasserzeys do legi s`Dusche dehei nömm denne

Esch eini Fudliburger do eini binzelige Sieche oder sosch eini Personee
wo kann erlauben haben viele Geld in sini Portemonee
den neme scholl gotfredstruunz eini paar Franke ond zahle eis zo meer
well Schnetzelbank habe fertig ond bine jetze wie Flasche leer

Der Komedi⁹⁹

Wänd er me bsueche? Ich be dehei onder „www.komedi.ch“